

§. 2.

Od Imena Szamoztavnoga v
oszebnom.

Na kaj je paziti pri Szamoztavnem Imenu?

1) Kojega je Zpola. 2) Kojega je Broja.
3) Kojega je Padanya. 4) Kojega je Premena-
nanya iliti Declinatie.

Pochemsze pozna, kojega je Zpola Ime?

Iz diachkoga Zpolnika, iliti Articulusa;
koje ima Zpolnika hic je muskoga Zpola,
kakti hic Dominus; koje ima Zpolnika haec,
je senzkoga Zpola v. P. haec mater, ova
Mati: koje ima Zpolnika hoc, je neznanoga
Zpola, kakti hoc animal, ovo Sivinche.

Kaj je Padanye?

Casus iliti Padanye je Premenanye zad-
nye Szlovke Nominativusha.

Kuliko je Padanyih?

Shezt: 1. Nominativus. 2. Genitivus.
3. Dativus. 4. Accusativus. 5. Vocativus.
6. Ablativus.

Kuliko je Brojnikov?

Dva: Singularis, jedino Brojnik, koj
Dugovanye jedno szamo znamenjuje v. P.
Dominus, Gozpon. Pluralis, Vechbrojnik,
koj od visheh Dugovany govori, v. P. Domi-
ni, Gozponi.